

INUIT ATAQATIGIIT

INATSISARTUNI



08. marts 2012

UPA 2012/120

Inatsisartut Suleriaasianni § 36 naapertorlugu oqallisissiaq imaattoq matumuuna saqqummiuppara:

Sunngiffimmi piniarnermut allagartalinnut tuttunik umimmannillu pisassiinermi immikkut akiliuteqartitsisoqartalissanersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Storm Ludvigsen, Inuit Ataqatigiit)

Tunngavilersuut:

Skema matuma ataani takussutissiisoq naapertorlugu 2011-imi sunngiffimmi piniarnermut allagartallit 4.969-inik, inuussutissarsiutigalugulu piniarnermut allagartallit 2.054-inik amerlassuseqarput.

	2006	2007	2008	2009	2010	2011
Sunngiffimmi pinaluttartut	5.685	5.807	5.110	5.258	5.548	4.969*
Inuussutissarsiutigalugu piniartut	2.482	2.373	2.127	1.712	2.083	2.054*

*06.12.2011-mi naatsorsuinermi

Kisitsisit Aalisarnermut, Piniarnermut Nunalerinermullu Naalakkersuisoqarfimmeersuupput.

Nunatsinni pinaluttartut ima amerlatigilersorinarput tuttunniarnerup aammalu umimmanniarnerup nalaani inuussutissarsiutigivillugu piniartunut inangeeqqasutut isumaqarfiginarinnaallutik. Sunngiffimmi pinaluttartut aalaakkaasumik isertitaqartuupput, pinngortitami pisuussutit uumassusillit piniartut aningaasarsiorsinnaanerannut tunngavissatuaallutik.

Inoqutigiinni saniatigooralugu piniarnissamut allagartallit arlaliuppata, soorlu pingasuuppata tamarmillu tallimanik immikkut tuttutassinneqarunik katillugit 15-inik tuttussinnaalissapput. Taamaalillunilu inuussutissarsiutigalugu piniartup tuttunik tunisinissamik taamatullu aningaasarsioarnissamut periarfissai annikillisinneqarput.

Isumaqarpunga piniartut inuussutissarsiuteqarnerup Nunatsinnit tapersorsorneqarneru-nissaa pimoorunneqarnerusariaqartoq aammalu piniartortavut tassaasariaqartut inuussutissamik pilersuisussatta pingarneraat.